

ЎЗБЕКИСТОН РЕСПУБЛИКАСИ ОЛИЙ ВА ЎРТА МАХСУС
ТАЪЛИМ ВАЗИРЛИГИНИНГ ЎРТА МАХСУС, КАСБ-ХУНАР
ТАЪЛИМИ МАРКАЗИ
ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИ
ХУЗУРИДАГИ ДАВЛАТ ТЕСТ МАРКАЗИ
ЎЗБЕКИСТОН РЕСПУБЛИКАСИ
ХАЛҚ ТАЪЛИМИ ВАЗИРЛИГИНИНГ
ҚАРОРИ

**249 Академик лицей ва касб-хунар коллежларининг мас-
лаҳат марказлари тўғрисидаги низомни тасдиқлаш
ҳақида**

*Ўзбекистон Республикаси Адлия вазирлиги томонидан 2014 йил
21 майда рўйхатдан ўтказилди, рўйхат рақами 2586*

Ўзбекистон Республикасининг «Таълим тўғрисида»ги Қонуни (Ўзбекистон Республикаси Олий Мажлисининг Ахборотномаси, 1997 й., 9-сон, 225-модда) ва Ўзбекистон Республикаси Вазирлар Маҳкамасининг 2010 йил 7 июндаги 109-сонли «Умумтаълим мактабларининг 9-синф битирувчиларини академик лицейлар ва касб-хунар коллежларида ўқитиш билан қамраб олишни таъминлаш бўйича норматив-ҳуқуқий базани янада такомиллаштириш тўғрисида»ги қарорига (Ўзбекистон Республикаси қонун ҳужжатлари тўплами, 2010 й., 23-сон, 184-модда) мувофиқ Ўзбекистон Республикаси Олий ва ўрта махсус таълим вазирлигининг Ўрта махсус, касб-хунар таълими маркази, Вазирлар Маҳкамаси ҳузуридаги Давлат тест маркази ва Халқ таълими вазирлиги **қарор қилади:**

1. Академик лицей ва касб-хунар коллежларининг маслаҳат марказлари тўғрисидаги низом иловага мувофиқ тасдиқлансин.

Ўзбекистон Республикаси қонун ҳужжатлари тўплами, 2014 й.

2. Мазкур қарор расмий эълон қилинган кундан эътиборан кучга киради.

**Олий ва ўрта махсус таълим
вазирлигининг Ўрта махсус,
касб-ҳунар таълими
маркази директори**

У. САЛИМОВ

Тошкент ш.,
2014 йил 23 апрель,
31/ҚҚ-сон

**Вазирлар Маҳкамаси ҳузуридаги
Давлат тест маркази директори**

Ж. ИСМОИЛОВ

Тошкент ш.,
2014 йил 23 апрель,
08/ҚҚ-сон

Халқ таълими вазири

У. ИНОЯТОВ

Тошкент ш.,
2014 йил 23 апрель,
28-сон

Ўзбекистон Республикаси
Олий ва ўрта махсус таълим вазирлигининг
Ўрта махсус, касб-ҳунар таълими маркази,
Вазирлар Маҳкамаси ҳузуридаги Давлат тест
маркази ва Халқ таълими вазирлигининг
2014 йил 23 апрелдаги 31/ҚҚ, 08/ҚҚ ва
28-сонли қарорига
ИЛОВА

**Академик лицей ва касб-ҳунар коллежларининг маслаҳат
марказлари тўғрисидаги
НИЗОМ**

Мазкур Низом Ўзбекистон Республикасининг «Таълим тўғрисида»ги Қонунига ва Ўзбекистон Республикаси Вазирлар Маҳкамасининг 2010 йил 7 июндаги 109-сонли «Умумтаълим мактабларининг 9-синф битирувчиларини академик лицейлар ва касб-ҳунар коллежларида ўқитиш билан қамраб олишни таъминлаш бўйича норматив-ҳуқуқий базани янада такомиллаштириш тўғрисида»ги қарорига асосан, маслаҳат маркази фаолиятини ташкил этиш тартибини белгилайди.

1-боб. Умумий қоидалар

1. Мазкур Низом ҳарбий академик лицейларга нисбатан татбиқ этилмайди.

2. Вазирлар Маҳкамасининг 2010 йил 7 июндаги 109-сонли қарори билан тасдиқланган Умумтаълим мактабларининг 9-синф битирувчиларини ўрта махсус, касб-хунар таълими муассасаларига қабул қилиш ва расмийлаштиришни ташкил этиш тартиби тўғрисидаги низомга асосан, ўқувчиларни қабул қилиш даврида ҳар бир академик лицей ва касб-хунар коллежида (бундан буён матнда таълим муассасаси деб юритилади) маслаҳат марказлари ташкил этилади.

3. Маслаҳат маркази ўз фаолиятини Ўзбекистон Республикасининг Конституцияси ва қонунларига, Ўзбекистон Республикаси Олий Мажлиси палаталарининг қарорларига, Ўзбекистон Республикаси Президентининг фармонлари, қарорлари ва фармойишларига, Ўзбекистон Республикаси Вазирлар Маҳкамасининг қарорлари, ушбу Низом ва бошқа қонун ҳужжатларига амал қилади.

2-боб. Маслаҳат марказининг мақсади ва вазифалари

4. Маслаҳат марказининг мақсади умумтаълим мактабларининг 9-синф битирувчиларини (бундан буён матнда битирувчилар деб юритилади) таълим муассасаларида ўқитиш билан тўлиқ қамраб олишни самарали ташкил этиш ҳисобланади.

5. Қўйидагилар маслаҳат марказининг вазифалари ҳисобланади:

битирувчилар ва уларнинг ота-оналарига (уларнинг ўрнини босувчи шахсларга) уларнинг истагини инобатга олган ҳолда касб-хунар танлаш бўйича маслаҳатлар бериш;

битирувчилар ва уларнинг ота-оналарига (уларнинг ўрнини босувчи шахсларга) таълим муассасасида мавжуд йўналишлар ва касблар тўғрисида маълумотлар бериш;

қабул вақтида таълим муассасаси фаолиятига оид буклетлар, аудио-видео ва бошқа зарур материаллар тайёрлаш;

ўз фаолияти ҳақида оммавий ахборот воситалари орқали тарғибот-ташвиқот ишларини олиб бориш;

зарур ҳолларда битирувчилар ва уларнинг ота-оналарига (уларнинг ўрнини босувчи шахсларга) таълим муассасасида мавжуд тегишли йўналишлар ва тайёрланадиган касблар учун тиббий кўрикдан ўтиш бўйича тавсиялар бериш ва шарт-шароитлар яратиб бериш;

битирувчилар ва уларнинг ота-оналарига (уларнинг ўрнини босувчи шахсларга) таълим муассасасида мавжуд йўналишлар ва тайёрланадиган касблар, иш кириш учун йўлланма берилиши мумкин бўлган ташкилотлар, лавозимлар, тегишли қонун ҳужжатлари ҳамда соҳага оид асосий талаблар ҳақида тушунтириш бериш;

битирувчилар ва уларнинг ота-оналари (уларнинг ўрнини босувчи шахс-

лар) учун касбга йўналтириш бўйича очиқ эшиклар кунларини ташкил этиш ҳамда уларни таълим муассасасида яратилган барча шарт-шароитлар билан таништириш;

таълим муассасасига битирувчиларнинг ҳужжатларини қабул қилиш;

битирувчиларни қамраб олиш жараёнининг боришини оммавий ахборот воситалари орқали, шунингдек таълим муассасасининг расмий веб-сайтида кенг ёритилишини таъминлаш;

саралаш тест синовлари ўтказилганда, битирувчилар ёки уларнинг ота-оналарини (уларнинг ўрнини босувчи шахсларни) саралаш тест синовлари ўтказиладиган кунлар ҳақида хабардор қилиш, шунингдек таълим муассасасида тузиладиган комиссияга саралаш тест синовларини (ижодий имтиҳонларни) ташкил этиш ва ўтказишда бевосита кўмаклашиш ва зарур маълумотларни тақдим этиш;

саралаш тест синови натижаларини эълон қилиш ҳамда абитуриентларга саралаш тест синови натижалари бўйича тўлиқ маълумот бериш;

битирувчиларнинг ҳужжатлари билан биргаликда шахсий ҳужжатлари йиғма жилдини шакллантириш ва сақлаш;

битирувчиларни таълим муассасасига ўқитиш билан қамраб олиш бўйича тегишли статистик маълумотларни тайёрлаш ва уларни ҳудудий ўрта махсус, касб-ҳунар таълими бошқармаси ёки тегишли вазирлик ва идорага тақдим этиш;

саралаш тест синовларидан, шунингдек маданият, санъат ва бошқа ижодий йўналишлари бўйича ижодий имтиҳонлардан ўта олмаган битирувчиларнинг ҳужжатларини битирувчилар ва уларнинг ота-оналари (уларнинг ўрнини босувчи шахслар) розилиги билан қамраб олиш имконияти мавжуд бўлган таълими муассасаларига далолатнома асосида ўтказилишини таъминлаш.

Маслаҳат маркази қонун ҳужжатларига мувофиқ бошқа вазифаларни ҳам амалга ошириши мумкин.

3-боб. Маслаҳат маркази фаолиятини ташкил этиш

6. Маслаҳат маркази фаолиятига таълим муассасасининг директори раҳбарлик қилади.

7. Таълим муассасаси директори ҳар йили 10 мартга қадар маслаҳат марказининг масъул котиблигига 3 нафар номзоднинг рўйхатини ҳудудий ўрта махсус, касб-ҳунар таълими бошқармасига, бошқа вазирлик ёки идора тасарруфидаги таълим муассасаси директори эса, тегишли вазирлик ёки идорага келишиш учун киритади.

8. Маслаҳат маркази аъзолари сони ҳар бир таълим муассасасида иш ҳажми, қабул режаси ва квотасидан келиб чиқиб, камида 5 кишидан иборат бўлади.

9. Маслаҳат маркази аъзолари таркибига таълим муассасасининг амалиётчи психологи ҳамда тажрибали педагоглари киритилиши лозим.

Бошқа вазирлик ёки идора тасарруфидаги таълим муассасасининг маслаҳат маркази аъзолари таркибига тегишли вазирлик ёки идоранинг вакили ҳам киритилиши мумкин.

10. Маслаҳат маркази аъзолари таркиби таълим муассасаси директорининг буйруғи билан тасдиқланади. Мазкур буйруқ билан маслаҳат маркази масъул котиби ва аъзоларининг вазифалари, ҳуқуқ ва мажбуриятлари белгиланади.

11. Маслаҳат маркази раҳбари:

маслаҳат маркази фаолиятига умумий раҳбарлик қилади;

маслаҳат маркази фаолияти билан боғлиқ масалалар бўйича қарорлар қабул қилади ҳамда маслаҳат марказига юкланган вазифаларнинг бажарилиши учун шахсан жавоб беради;

маслаҳат маркази масъул котиби ва аъзоларининг вазифаларини тақсимлайди ҳамда уларнинг ҳуқуқ ва мажбуриятларини белгилайди;

маслаҳат маркази масъул котиби ва аъзолари томонидан бажарилиши мажбурий бўлган буйруқлар чиқаради ҳамда кўрсатмалар беради;

зарурат бўлганда, маслаҳат маркази таркибига ўзгартиришлар киритади;

маслаҳат маркази йиғилиши баённомаларини тасдиқлайди;

қабул қилинган ҳужжатларни рўйхатга олиш китобларини имзолайди ва муҳр билан тасдиқлайди;

қабул билан боғлиқ ҳужжатларнинг тўғри расмийлаштирилиши, ҳисоботининг олиб борилиши ва белгиланган тартибда сақланишини назорат қилади;

маслаҳат марказининг фаолият юритиши учун зарур бўлган техник воситалар ва канцелярия моллари билан таъминлайди;

саралаш тест синовлари ўтказиладиган таълим муассасаларида фаолият кўрсатадиган комиссия таркибида аъзо сифатида иштирок этади ва комиссия раисига саралаш тест синовларини ўтказишда амалий ёрдам кўрсатади;

битирувчилар ва уларнинг ота-оналарини (уларнинг ўрнини босувчи шахсларни) ва бошқа фуқароларни қабул қилади.

4-боб. Яқуний қоидалар

12. Битирувчиларни ўқитиш билан таълим муассасасига қамраб олиш жараёнини қонун ҳужжатларига мувофиқ ташкил этиш ва амалга ошириш учун маслаҳат маркази раҳбари ва масъул котиби масъулдир.

13. Маслаҳат марказлари фаолияти ҳар йили 1 декабрга қадар таълим муассасаси директорининг буйруғига асосан тугатилади.

14. Маслаҳат маркази ишидан норози бўлган шахслар қонун ҳужжатларида белгиланган тартибда шикоят қилиш ҳуқуқига эга.

15. Ушбу Низом Ўзбекистон Республикаси Соғлиқни сақлаш вазирлиги, Меҳнат ва аҳолини ижтимоий муҳофаза қилиш вазирлиги, Маданият ва спорт ишлари вазирлиги, Қишлоқ ва сув хўжалиги вазирлиги, Ўзбекистон

Бадий академияси, Давлат солиқ қўмитаси ҳамда «Ўзбекистон темир йўллари» ДАТК билан келишилган.

Соғлиқни сақлаш вазири

А. АЛИМОВ

2014 йил 16 апрель

Меҳнат ва аҳолини ижтимоий муҳофаза қилиш вазири

А. ҲАИТОВ

2014 йил 16 апрель

Маданият ва спорт ишлари вазири

М. ХОДЖИМАТОВ

2014 йил 16 апрель

Қишлоқ ва сув хўжалиги вазири

Ш. ТЕШАЕВ

2014 йил 16 апрель

Ўзбекистон Бадий академия раиси

А. НУРИДИНОВ

2014 йил 16 апрель

Давлат солиқ қўмитаси раиси

Б. ПАРПИЕВ

2014 йил 16 апрель

«Ўзбекистон темир йўллари» ДАТК раиси

А. РАМАТОВ

2014 йил 16 апрель